



## SIARAN AKHBAR

### KENYATAAN DASAR BDCB 2/2024

---

1. Brunei Darussalam Central Bank (BDCB) hari ini telah mengeluarkan kenyataan dasar BDCB yang kedua bagi tahun 2024.
2. Di dalam Kenyataan Dasar 2/2024 tersebut, BDCB mengongsikan bahawa International Monetary Fund (IMF) mengunjurkan pertumbuhan ekonomi global akan kekal pada kadar 3.2% pada tahun 2024 dan 2025. Sementara itu, ekonomi domestik telah meningkat sebanyak 6.4% pada separuh pertama 2024, didorong oleh sektor Minyak dan Gas dan sektor Bukan Minyak dan Gas, yang masing-masing meningkat sebanyak 8.3% dan 4.8%. Memandang ke hadapan, momentum pertumbuhan ekonomi domestik dijangka akan berterusan sepanjang 2024, didukung oleh perkembangan positif di sektor-sektor Minyak dan Gas dan Bukan Minyak dan Gas, serta projek-projek pelaburan langsung asing (FDI). Walau bagaimanapun, masih terdapat risiko penurunan yang berkemungkinan berpunca daripada penurunan harga komoditi dan permintaan yang lebih lemah dari rakan dagangan utama.
3. Tren disinflasi global menyumbang kepada deflasi domestik bagi sebahagian besar tahun 2024. Faktor-faktor lain yang mempengaruhi tren ini termasuk subsidi, kawalan harga, dan dasar monetari negara. Inflasi yang diimpot adalah terkawal disebabkan oleh kesamarataan nilai dolar Brunei dengan dolar Singapura, yang didukung oleh keputusan Monetary Authority of Singapore untuk mengekalkan dasar moneterinya pada bulan Oktober 2024. Mengambil kira faktor tersebut serta data Indeks Harga Pengguna terkini, BDCB telah menyemak semula unjuran inflasi Negara Brunei Darussalam bagi tahun 2024 ke lingkungan -0.7% hingga 0.3%.
4. Pada suku ketiga 2024, sektor kewangan Negara Brunei Darussalam merekodkan peningkatan sebanyak 4.1% dengan nilai aset keseluruhan sebanyak BND24.3 bilion, di mana BND14.3 bilion (58.7%) merupakan aset kewangan Islam. Institusi-institusi penerima deposit pula menyumbang sebanyak 91.5% kepada jumlah keseluruhan aset sektor kewangan dengan nilai aset berjumlah BND22.2 bilion. Kedudukan modal industri perbankan kekal berdaya tahan dan stabil dengan agregat Nisbah Kecukupan Modal (*Capital Adequacy Ratio*) sebanyak 21.7% pada suku ketiga 2024. Selain itu, terdapat sedikit penurunan dalam pulangan keuntungan industri perbankan pada suku yang sama.
5. Selaras dengan komitmen BDCB dalam memupuk ekonomi digital yang dinamik dan menyokong penubuhan ekonomi digital, BDCB telah membuat pindaan terhadap Kriteria Pelesenan bagi Perniagaan Pengiriman Wang. Selain itu, dalam usaha pembangunan pasaran modal, BDCB juga mengeluarkan *Brunei Darussalam Investment Data Supply-Side Survey Reporting Guideline* kepada pengantara pasaran modal berlesen di Negara Brunei Darussalam.

6. Kenyataan Dasar BDCB 2/2024 yang lengkap boleh didapati di laman sesawang BDCB di [www.bdcg.gov.bn](http://www.bdcg.gov.bn). Bagi maklumat lanjut dan sebarang pertanyaan, orang ramai bolehlah menghubungi BDCB di talian 8318388, atau melalui emel di [info@bdcg.gov.bn](mailto:info@bdcg.gov.bn).

**Brunei Darussalam Central Bank**

Date: 28 Jamadilakhir 1446H / 30 Disember 2024M

Ref: BDCB/COMMS/